



Na osnovu člana 8. Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije Bosne i Hercegovine", br. 12/03, 34/03 i 65/13), a u vezi sa članom 25. Zakona o ustanovama ("Službeni list RBiH", br. 6/92, 8/93 i 13/94), Odlukom o standardima i kriterijima za imenovanje na pozicije predsjednika i članova upravnog odbora i predsjednika i članova nadzornog odbora Kantonalne javne ustanove za zaštićena prirodna područja ("Službene novine Kantona Sarajevo", broj 48/16) i Odlukom o osnivanju Kantonalne javne ustanove za zaštićena prirodna područja ("Službene novine Kantona Sarajevo", broj 31/17), ministar prostornog uređenja, građenja i zaštite okoliša Kantona Sarajevo objavljuje

JAVNI OGLAS
za imenovanje kandidata na upražnjenu poziciju predsjednika Upravnog odbora
Kantonalne javne ustanove za zaštićena prirodna područja

1. Predmet Javnog oglasa:

Oglašava se upražnjena pozicija u Kantonalnoj javnoj ustanovi za zaštićena prirodna područja (u daljem tekstu: Javna ustanova):

- Predsjednik Upravnog odbora 1

2. Način izbora, mandat i naknada za rad predsjednika Upravnog odbora

Predsjednika Upravnog odbora Javne ustanove imenuje Vlada Kantona Sarajevo, na prijedlog Ministra prostornog uređenja, građenja i zaštite okoliša Kantona Sarajevo, na vremenski period do isteka mandata Upravnog odbora Javne ustanove imenovanog Rješenjem Vlade Kantona Sarajevo broj: 02-05-3734-13.1/17 od 09.02.2017. godine ("Službene novine Kantona Sarajevo", broj 7/17).

Predsjednik Upravnog odbora Javne ustanove ima pravo na naknadu za svoj rad, koja se utvrđuje aktom Vlade Kantona Sarajevo o određivanju visine plaća i naknada organa upravljanja i drugih organa institucija Kantona Sarajevo, kantonalnih javnih preduzeća i javnih ustanova čiji je osnivač Kanton Sarajevo.

3. Opis pozicije

Zajedno sa ostalim članovima Upravnog odbora obavlja poslove od značaja za oblast kojom se bavi Javna ustanova, a koji se sastoje u: donošenju Pravila Javne ustanove, imenovanju i razrješenju direktora, utvrđivanju planova rada i razvoja, utvrđivanju godišnjeg programa rada, donošenju finansijskog plana i usvajanju godišnjeg obračuna, donošenju općeg akta o unutrašnjoj organizaciji i sistematizaciji poslova i drugih općih akata u skladu sa zakonom i pravilima, odlučivanju o svim pitanjima obavljanja djelatnosti radi kojih je Javna ustanova osnovana (ako zakonom nije određeno da o određenim pitanjima odlučuje drugi organ), usmjeravanju, kontrolisanju i ocjenjivanju rada direktora, rješavanju svih pitanja sa osnivačem, odgovornosti osnivaču za rezultate rada Javne ustanove, podnošenju osnivaču najmanje jednom godišnje izvještaja o poslovanju Javne ustanove, dostavljanju godišnjeg programa rada i finansijskog plana, te odlučivanju o drugim pitanjima utvrđenim zakonom, podzakonskim aktima i Pravilima Javne ustanove.

4. Uslovi za pozicije

Svi kandidati moraju ispunjavati opće i posebne uslove.

Opći uslovi:

- a) da je stariji od 18 godina (**dokaz:** Izvod iz matične knjige rođenih);

- b) da nije otpušten iz državne službe kao rezultat disciplinske mjere na bilo kojem nivou u Bosni i Hercegovini u periodu od tri godine do dana objavljivanja upražnjene pozicije (**dokaz:** Izjava potpisana od strane kandidata i ovjerena kod nadležnog organa);
- c) da se na tog kandidata ne odnosi član IX.1. Ustava Bosne i Hercegovine (**dokaz:** Izjava potpisana od strane kandidata i ovjerena kod nadležnog organa).

Posebni uslovi:

- a) da je državljanin Bosne i Hercegovine (**dokaz:** uvjerenje o državljanstvu ne starije od šest mjeseci od dana izdavanja od strane nadležnog organa do dana predaje prijave na Javni oglas);
- b) da nije osuđivan za krivično djelo i za privredni prestup nespojiv sa obavljanjem dužnosti u Upravnom odboru Javne ustanove i to pet godina od pravosnažnosti presude, isključujući vrijeme zatvorske kazne (**dokaz:** Izjava potpisana od strane kandidata i ovjerena kod nadležnog organa);
- c) da nije izabrani zvaničnik, nosilac izvršnih funkcija ili savjetnik u smislu Zakona o sukobu interesa u institucijama vlasti Bosne i Hercegovine, kao i Zakona o sukobu interesa u organima vlasti u Federaciji Bosne i Hercegovine (**dokaz:** Izjava potpisana od strane kandidata i ovjerena kod nadležnog organa);
- d) da ima završen VII (sedmi) stepen školske spreme, odnosno najmanje prvi ciklus bolonjskog studija visokog obrazovanja u trajanju od najmanje tri studijske godine sa akademskom titulom i stručnim zvanjem bakalaureat/bachelor (180 ECTS bodova) (**dokaz:** univerzitetska diploma, ili uvjerenje o diplomiranju koje ne može biti starije od roka potrebnog za izdavanje diplome, odnosno ne starije od jedne godine od dana diplomiranja);
Napomena: Ukoliko kandidat prilaže uvjerenje o diplomiranju dužan je dostaviti i potpisano kratko obrazloženje-izjavu iz kog razloga dostavlja uvjerenje, a ne ovjerenu kopiju univerzitetske diplome, te ukoliko diploma nije izdata u predviđenom roku, u tom slučaju dostaviti potvrdu visokokoškolske ustanove da ista nije izdata.
- e) da ima najmanje pet godina radnog iskustva u struci nakon sticanja univerzitetske diplome (**dokaz:** Uvjerenje/Potvrda poslodavca o radnom iskustvu u struci);
- f) da nema privatni finansijski interes u Javnoj ustanovi u čiji se Upravni odbor imenuje (**dokaz:** Izjava potpisana od strane kandidata i ovjerena kod nadležnog organa);
- g) da nije direktor javne ustanove (**dokaz:** Izjava potpisana od strane kandidata i ovjerena kod nadležnog organa);
- h) da u trenutku podnošenja prijave na upražnjenu poziciju nije član više od jednog upravnog i/ili nadzornog odbora bilo kojeg pravnog lica (ustanove, privredno društvo, agencije, udruženja, fondovi, i dr.) (**dokaz:** Izjava potpisana od strane kandidata i ovjerena kod nadležnog organa);
Napomena: Ukoliko je kandidat već član jednog ili više upravnog i/ili nadzornog odbora, u izjavi obavezno navesti naziv pravnog/pravnih lica.
- i) da je u Javnoj ustanovi zaposlen na neodređeno vrijeme-odnosi se na kandidate koji apliciraju ispred zaposlenika Javne ustanove (**dokaz:** uvjerenje/potvrda koju izdaje Javna ustanova da je kandidat zaposlen na neodređeno vrijeme).

Pored navedenih uslova, kandidat je u svrhu dokazivanja da nije na funkciji u političkoj stranci u smislu člana 5. Zakona o ministarskim, vladinim i drugim imenovanjima Federacije Bosne i Hercegovine, dužan priložiti potpisanu i ovjerenu izjavu od strane nadležnog organa.

5. Kandidovanje

Uz prijavu koja sadrži kraću biografiju, adresu i kontakt telefon, kandidati su dužni priložiti originalne dokumente ili ovjerene kopije istih ne starije od šest mjeseci i ne starije od roka koji je naveden za pojedine dokaze kojima se ispunjavaju opći i posebni uslovi traženi Javnim oglasom. Javni oglas ostaje otvoren **15 dana od dana posljednjeg objavljivanja**. Oglas će biti objavljen u "Službenim novinama Federacije Bosne i Hercegovine", dnevnom listu "Dnevni avaz" i na web stranici Ministarstva prostornog uređenja, građenja i zaštite okoliša Kantona Sarajevo.

6. Ostale napomene

Svi kandidati koji budu stavljeni na Listu sa užim izborom biće pozvani na intervju pred Komisijom za izbor. Prije intervjua kandidati su dužni dati podatke o ranijim neposrednim rukovodiocima od kojih se mogu dobiti preporuke i informacije o kandidatima, te ispuniti obrazac u kome će iznijeti bilo koje pitanje ili mogućnost koja bi mogla dovesti do sukoba interesa u slučaju da dođe do njegovog imenovanja. Obrasci će se popuniti neposredno prilikom intervjua. Niti jedan kandidat neće biti stavljen na Listu užeg izbora ukoliko nije povoljno ocijenjen prema kriterijima za imenovanje.

Sve informacije u toku postupka kandidovanja su transparentne, osim ako informacije o podnosiocima prijave nisu povjerljive u smislu važećeg Zakona o zaštiti ličnih podataka Bosne i Hercegovine.

Kandidate koje nakon intervjua preporučí Komisija za izbor, smatraće se da su najuspješnije prošli otvorenu konkurenciju. Konačno imenovanje kandidata na poziciji predsjednika Upravnog odbora izvršiće Vlada Kantona Sarajevo na osnovu predložene rang-liste najbolje ocijenjenih kandidata.

Bilo koji kandidat, odnosno bilo koje drugo lice - član javnosti može podnijeti prigovor na konačno imenovanje, ako postoje dokazi da u procesu imenovanja nisu ispoštovani principi i postupci utvrđeni Zakonom o ministarskim, vladinim i drugim imenovanjima. Prigovor se podnosi Vladi Kantona Sarajevo, a kopija istog se dostavlja i Ombudsmenu za ljudska prava Bosne i Hercegovine.

Prijave sa svim traženim dokumentima dostavljaju se lično (putem Službe za protokol Kantona Sarajevo) ili poštom preporučeno na adresu:

Ministarstvo prostornog uređenja, građenja i zaštite okoliša Kantona Sarajevo,
Komisija za izbor,
ulica Reisa Džemaludina Čauševića 1, Sarajevo
prizemlje (pisarnica), uz naznaku:

“PRIJAVA ZA PREDsjedNIKA UPRAVNOG ODBORA KANTONALNE JAVNE USTANOVE ZA ZAŠTIĆENA PRIRODNA PODRUČJA - NE OTVARAJ”.

Na poledini koverta obavezno čitko navesti ime i prezime podnosioca, adresu i kontakt telefon.

Nepotpune, neblagovremene i neuredne prijave neće se uzeti u razmatranje.

Nakon završene procedure imenovanja, prijava i dokumentacija se neće vraćati kandidatima koji su aplicirali na ovaj Javni oglas.

Broj: 05-05-20046/18
Sarajevo, 23.04.2018. godine

MINISTAR

Čedomir Lukić, dipl. ing. arh.



web: <http://mpz.ks.gov.ba>
e-mail: mpz@mpz.ks.gov.ba
Tel: + 387 (0) 33 562-029, Fax: + 387 (0) 33 562-031
Sarajevo, Reisa Džemaludina Čauševića 1

